

Թիֆլիսում գտնուող մեծ-բրիտանական զորավար Ռայկրոֆտը և Փրանսական առաքելութեան պետ գնդ. Շարդինին, Վրաստանի Հանրապետութեան նախագահ Ժորդանիայի հետ ունեցած խորհրդաժողովում, պ. Ջամալեանի ներկայութեամբ, որոշեցին, որ պատերազմական դործողութիւնները անյապաղ պէտք է վերջացեն:

Չնայած պ. Ջամալեանի բողոքներին, զոր. Ռայկրոֆտը, գնդ. Շարդինին և Վրաստանի Հանրապետութեան նախագահ Ժորդանիան որոշեցին, որ

Անգլիական, Փրանսական, վրաց ու հայկական ներկայացուցիչներից բաղկացած մի խառն յանձնախումբ, ըստ կարելոյն շուտ, պէտք է մեկնի ճակատ, որպէսզի կեանքում իրականացնի հետևեալ պայմանները.

Յանձնախումբը որոշում է քանակը այն զօրքերի, որ վրացիները պէտք է թողնեն Բորչալուի գաւառի հիւսիսային մասում, իսկ հայերը՝ հարաւային, այլ և վրացիները՝ Ախալքալաքի գաւառում: Զօրքերը պէտք է լինեն սակաւթիւ:

Վրաց զօրքերը պէտք է մնան իրենց գրաւած այժմայ գծի վրա, հայ զօրքերը պէտք է նահանջեն Դսեղ—Ջալալ—Օղլի թիւրքական գիծը:

Վրացական և հայկական զօրքերի գրաւած տարածութեան միջև, երկաթուղու վրա, կը գտնեն բրիտանական պահակներ. վարչութիւնը այս վիճելի մասում կը լինի խառն:

Ախալքալաքի գաւառի վրացական վարչութեան վրա հսկում է դաշնակիցների մի յանձնախումբ, որի մէջ մտնում են ներկայացուցիչներ և տեղական հայ ու մահմետական բնակիչներից:

Երկու պետութեան՝ Վրաստանի ու Հայաստանի ներկայացուցիչները շուտով կուղարկեն Եւրոպա, ուր սահմանների վերաբերող ամբողջ հարցը կը լուծուի մեծ պետութիւնների կողմից:

Իսկականը ստորագրեցին Ռայկրոֆտ, Շարդինի, Ժորդանիա: Թիֆլիս, 25 դեկտ. 1918թ.»:

Յանձնախումբը՝ բաղկացած 2 անգլիացի, 1 Փրանսացի ու 1 վրացի սպաներից, անգլիական կապիտան Դըդլէզ Վիցերսի գլխաւորութեամբ, դեկտ. 28-ին, հասաւ Ղարաքիլիսա և հայկական հրամանատարութեան ներկայացրեց վերևի համաձայնութիւնը: Հայերը բողոքեցին ու պահանջեցին որոշ կէտեր փոխել, բայց, ի վերջոյ, անգլիացիների ճնշման տակ ստիպւած եղան համակերպել: Հայկական կառավարութիւնը, սակայն, համաձայնութեան մի քանի կէտեր համարում էր մութ և բացատրութիւն էր պահանջում, որի վրա յանձնախմբի նախագահը համաձայնեց իր հետ Թիֆլիս տանել հայերից երկու ներկայացուցիչ՝ մութ կէտերի վերջնական պարզաբանման համար: Բանակցութիւններից յետոյ, դեկտ. 30-ին, որոշեց, միւս օրը, դեկտ. 31-ի գիշերւայ ժամը 12-ին, վերջ տալ պատերազմական դործողութիւններին, որից յետոյ հայկական պատերազմութիւնը պէտք է մեկնէր Թիֆլիս՝ հաշտութեան բանակցութիւնների համար:

Յանձնախմբի Ղարաքիլիսա հասնելու օրն իսկ, դեկտ. 28-ին վրացիներն ամբողջ ճակատի վրա անցան ընդհանուր յարձակման: Նրանց ուժերը աւելացել էին, մատակարարման դործը հեշտացել էր. նրանց միացել էին և Բորչալուի թուրքերը, որոնք կուր դաշտ էին հանել կամաւորական խմբեր: Ռազմապիտական տեսակէտից նահանջը վրացիներին օգտակար էր եղել.